



## STINAPA TA INFORMA

PISKÁ ANGELITO

Tur hende konosé Anusjka Beaumont-Thomas komo 'Treesje', e dama ku gusta hari un mundu. Kasá ku 3 yu, ainda Treesje tin tempu pa su hòbinan ku ta müzik, kushiná i ... traha! Awor Treesje ta traha na 'Caribbean Laundry Services'. Treesje ta sinti'é orguyoso di e airu limpi di Boneiru. I di nos medio ambiente sin huma i sushedat. E limpiesa tambe ta kontá, segun Treesje, pa e bida bou di laman i playanan. E ta gosa ora e wak kon turistanan ta para kant'i kaminda di Rincon speshal pa saka potrèt di buriku- i yuananan. P'e, e naturalesa boneriano tin un balor masha grandi mes. Treesje i su famia stima Washington Park mashá. Speshalmente pa su playa- i paisahenan bunita. Boka Kokolishi ta un di e dos playanan ku e ta enkantá ku n'e: e laman ta asina ketu i yen di santu, ideal pa muchanan. Miéntas mas bo sigui landa bai afó, bo ta haña su kaida. Ei si e ta bira brutu i yen di ola. Pero esun faborito ta keda Wayaká. Treesje ta kontá ku e ta un laman yen di piská i un trapi semi-natural pa bo kana bai abou. Su yunan gusta landa i disfrutá di wak e bunita piskánan Angelfish. Otro fasinashon di su yunan ta pa para wak tur e lagadishinan ku ta aglomerá. Tokante e relashon di nos naturalesa ku ekonomia, Treesje ta masha kla. E turista ta bini pa tur e kosnan bon, tantu riba tera komo bou di awa. E ta pidi un i tur, tantu bonerianonan komo tur ku ta residensia aki, pa kuida e naturalesa. "Pa asina nos sigui engrandesé nos naturalesa i direktamente nos turismo. Ta nan ta saka sèn den restorantnan, hürmentu di outu, kompranan den kaya èts. Mi kier pa bark'i turistanan sigui dreña. Ya asina e turistanan ta disidí despues pa bini ku avion. I trese mas entrada pa nos ekonomia." Komo último konseho, Treesje ta trese dilanti pa nos ta mas servisial i pa nos mes buska mas informashon tokante naturalesa boneriano. Di e manera aki nos por splika e turista mas i laga e sigui hasi propaganda pa nos den eksterior.

*Skirbí pa Natalie Wanga*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALES



**Traha huntú na un desaroyo duradero pa Boneiru**